

## **ВОСКРЕСНА СЛУЖБА 2 ГЛАСА В СУББОТУ НА ВЕЛИЦЕЙ ВЕЧЕРНИ**

На Господи, воззвах, поставим стихов 10, и поем стихиры воскресны осмогласника, 3: и Анатолиевы, 4: и минеи 3, или 4, или 6, аще празднуется святой. Слава, минеи, и ныне, Богородичен первый, гласа.

Стихиры воскресны, глас 2:

**Стих:** Изведи из темницы душу мою, \* исповедатися Имене Твоему.

**Прежде** век от Отца Рождшемуся Божию Слово, \* Волощшемуся от Девы Марии, \* приидите, поклонимся: \* крест бо претерпев, \* погребению предадешся, \* яко Сам восхоте: \* и воскресе из мертвых, \* спасе мя заблуждающаго человека.

**Стих:** Мене ждут праведницы, \* дондеже воздаси мне.

**Христос** Спас наш, \* еже на ны рукописание пригвозди \* на кресте заглади, и смерную державу упраздни: \* поклоняемся его Триденвному Воскресению.

**Стих:** Из глубины воззвах к Тебе, Господи, \* Господи, услыши глас мой.

**Со** Архангелы воспоем Христово Воскресение: \* Той бо есть Избавитель и Спас душ наших, \* и в славе страшней и крепчей силе, \* паки грядет судити миру, егоже созда.

Ины стихиры, Анатолиевы, глас тойже:

**Стих:** Да будут уши Твои внимлюще \* гласу моления моего.

**Тебе** Распешагося и Погребеннаго, \* Ангел проповеда Владыку, и глаголаше женам: \* приидите видите, \* идеже лежаше Господь: \* воскресе бо, яко же рече, \* яко Всесилен. \* Темже Тебе поклоняемся Единому Безсмертному: \* Жизнодавче Христе, помилуй нас.

**Стих:** Аще беззакония назриши, Господи, Господи, кто постоит; \* яко у Тебе очищение есть.

**Крестом** Твоим упразднил еси, \* юже от древа клятву, \* погребением Твоим умертвил еси смерти державу: \* востанием же Твоим просветил еси \* род человеческий. \* Сего ради вопием Ти: \* Благодетелю Христе Боже наш, слава Тебе.

**Стих:** Имене ради Твоего потерпех Тя, Господи, потерпе душа моя в слово Твое, \* упова душа моя на Господа.

**Отверзошася** Тебе, Господи, \* страхом врата смертная, \* вратницы же адовы видевши Тя, \* убояшася: \* врата бо медная сокрушил еси, \* и верей железныя стерл еси, \* и извел еси нас от тмы и сени смертныя, \* и узы наша растерзал еси.

**Стих:** От стражи утренния до нощи, от стражи утренния, \* да уповает Израиль на Господа.

**Спасительную** песнь поюще, \* от уст возслем: \* приидите вси в дому Господнем \* припадем, глаголюще: \* на древе Распныйся, \* и из мертвых Воскресый, \* и Сый в недрех Отчих, \* очисти грехи наша.

Таже минеи стихиры святому.

Слава святому, аще имать.

Аще ли ни, Слава, и ныне, Богородичен.

**Пр**ейде сень законная, \* благодати пришедши: \* якоже бо купина не стараше опаляема: \* тако Дева родила еси, \* и Дева пребыла еси. \* Вместо столпа огненного, \* Праведное возсия Солнце: \* вместо Моисея, Христос, \* Спасение душ наших.

Таже вход с кадилом. Свете Тихий: Прокимен и ектении.

*На стиховне стихиры воскресны, глас 2:*

**В**оскресение Твое, Христе Спасе, \* всю просвети вселенную, \* и призвал еси Твое создание: \* Всесильне Господи, слава Тебе.

Ины стихиры, по алфавиту:

**Стих:** Господь воцарися \* в лепоту облечеса.

**Д**ревом Спасе, упразднил еси, \* юже от древа клятву, \* державу смерти погребением Твоим \* умертвил еси, \* просветил же еси род наш востанием Твоим. \* Темже вопием Ти: \* Животодавче Христе Боже наш, слава Тебе.

**Стих:** Ибо утверди вселенную \* яже не подвижится.

**Н**а кресте явлься Христе пригвождаемь, \* изменил еси доброту зданий: \* и безчеловечие убо воины показующе, \* копием ребра Твоя прободоша, \* евреи же печатати гроба просяща, \* Твоя власти не ведуще. \* Но за милосердие утроб Твоих, приемый погребение, \* и тридневен воскресый Господи слава Тебе.

**Стих:** Дому Твоему подобаеи святыня \* Господи, в долготу дний.

**Ж**ивотодавче Христе, \* волею страсть претерпевый \* смертных ради, \* во ад же снизшед яко силен, \* тамо Твоего пришествия ожидающыя, \* исхитив яко от зверя \* крепкаго, рай вместо ада жити даровал еси. \* Темже и нам славящым тридневное Твое востание, \* даруй очищение грехов, и велию милость.

Слава, и ныне, Богородичен:

**О** чудесе новаго всех древних чудес! \* Кто бо позна мать без мужа рождшую, \* и на руку носящую, \* всю тварь Содержащаго? \* Божие есть изволение Рождшееся. \* Егоже яко Младенца, Пречистая, \* Твоима руками носившая, \* и Матернее дерзновение к Нему имущая, \* не престай молящи о чтущих Тя, \* ущедрити и спасти души наша.

Таже: Ныне отпуцаеши: Трисвятое. По Отче наш:

*Тропарь воскресен, глас 2:*

**Е**гда снизшел еси к смерти Животе Безсметный, \* тогда ад умертвил еси блистанием Божества: \* егда же и умершья от преисподних воскресил еси, \* вся силы небесныя взываху: \* Жизнодавче Христе Боже наш, слава Тебе.

Богородичен:

**В**ся паче смысла, \* вся преславная Твоя Богородице, таинства, \* чистоте запечатанной и девству храниму, \* Мати позналася еси неложна, \* Бога рождши Истиннаго: \* Того моли спастися душам нашим.

## В СУББОТУ НА ПОВЕЧЕРИИ,

Канон Пресвятей Богородице. [Егоже и от оклеветания, в печалех, и напастех сущии да поют.] Глас 2.

### Песнь 1

**Ирмос:** Во глубине постла иногда, \* фараонитское всевоинство преоруженная сила, \* воплощенное же Слово \* всезлобный грех потребило есть: \* Препрославленный Господь \* славно бо прославился.

**Припев:** Пресвятая Богородице спаси нас.

**И**же всем удобь послушная в скорби, и в печали помогающая, Богородице Благая, благодать подаждь пети Тя дерзающим, Владычице скорбящих радости.

**М**ногобогатную благодать стяжавши Владычице, дерзновенною Твоею молитвою, преславно изми мя от напастей, убогаго раба Твоего, скорбящих радости.

**Слава:** От враг видимых и невидимых избави, молимся, к Тебе прибегающих Богородице, и разори всяк совет борющихся нас.

**И ныне:** Отъими поношение человеческое, и клеветы наветник от мене, Богородице, молю Тя: да усердно славлю Господа, Егоже питала еси.

### Песнь 3

**Ирмос:** Утверди нас в Тебе Господи, \* древом умерщвей грех, \* и страх Твой всади в сердца \* нас поющих Тя.

**В**рагов наветы разори суетныя, Всепетая Богородице: не оскудей молитвами Твоими, снабдящи нас восхваляющих Тя.

**П**ризри Чистая, милостивным Твоим оком, и избави мя всякаго навета видимых и невидимых врагов, ослепивши зеницы очес их.

**Слава:** Злое нападение врагов, яко огонь палящее, ищущих всегда погубити нас Дево, росую молитв Твоих угаси.

**И ныне:** Неугасимая лампадо, заря присносиятельная, нощию мя скорбей одержима, просвети молитвами Твоими, рождающая Солнце славы Христа.

### Песнь 4

**Ирмос:** Услышах Господи глас Твой, егоже рекл еси, \* глас вопиющего в пустыни, \* яко возгремел еси над водами многими, \* Твоему свидетельствуяй Сыну, \* весь быв сошедшаго Духа, возопи: \* Ты еси Христос, Божия Мудрость и Сила.

**С**пасения Тя мост, молитву неусыпну, заступление твердо молим: умилосердися и виждь нашу нестерпимую печаль, болезни, скорби, страсти, и благопременно посети Мати Божия, радость скорую подающи.

**Н**е непричастни есмы Владычице, Твоего заступления в скорбех: темже и ныне нам помози вскоре, люте обуреваемых руку простирающи Чистая: буди милостива болезнем нашим, Мати Божия, радость скорую подающи.

**Слава:** Не уповаша Владычице на Тя беззаконнующии, но уповаша на язык велеречив, на язык человекъ, присно завистно излиывшийся, неправедно пролияти кровь искренняго, рыкающе: Ты же Чистая, челюсти их сокруши.

**И ныне:** Смири Владычице, врагов вознесенную выю велеречующих, советы и злонравия, и сердца поучающаяся злым на мя по вся дни: крепость же и победу подаждь призывающим Тя, Мати Божия, радость скорую подающи.

### Песнь 5

**Ирмос:** Угль Исаии проявлейся, \* Солнце из девственных утробы возсия, \* во тьме заблуждшым, \* богоразумия просвещение даруя.

Молитвеннице неложная, упование христиан, Обрадованная, прими мольбы от нас прилежно призывающих и молящихся Тебе.

Источник Тя жизни сущи Чистая, безсмертия источающий воды, земнороднии познавшие ублажаем.

**Слава:** Вооружися на ны лукавно враг, языком якоже мечем погубити хотя: но Твоею, Богородительнице, крепостию предвари.

**И ныне:** Пучину, Чистая, заступлению кто изочтет силы Твоея; темже нас сущих в нужде скоро предвари.

### Песнь 6

**Ирмос:** В бездне греховней валяясь, \* неизследную милосердия Твоего призываю бездну: \* от тли Боже мя возведи.

Целомудрия сущи Ходатаица, призывающим Тя ныне явися, и от всяких избави напастей и бед, Богоневесто.

Злодействия вражия разори, и клеветы неправедныя устави, Благословенная Пречистая, избавляющи неповинныя от скорби.

**Слава:** Лютыми грехи окружени, и нападными бедами потопляеми, под Божественный Покров Твой прибегаем, Мати Христа Бога.

**И ныне:** Неискусомужно рождши Господа, явися по Рождестве паки девствующи: О преславнаго чудесе, в Тебе Соделаннаго, Богоневесто!

**Таже:** Господи помилуй, [трижды]

**Слава, и ныне:**

**Седален, глас 2:**

Моление теплое, \* и стена необоримая, \* милости источниче, \* мiрови Прибежище, \* прилежно вопием Ти: \* Богородице Владычице предвари, \* и от бед избави нас, \* Единая вскоре Предстательствующая.

### Песнь 7

**Ирмос:** Да преславное Рождество Твое Христе, \* еже от Девы прообразиши яве, \* неопалимы в печи отроки сохранил еси, \* песньми поющыя Тебе: \* отцев Боже благословен еси.

**О** благоутробия Твоего Дево Чистая! Решиши бо безмерныя печали и напасти, призывающим в нужде и обстоянии: темже и ныне помози Благословенная, Тя восхваляющим.

**Покажи** скорое Твое заступление, покажи яко можеш, яко Мати Богу, призываем Тя от сердца со слезами припадающе, скорбь укроти и болезнь рабов Твоих вскоре.

**Слава:** Уста человеком яко львом лютым, гроба тяжчайше отверзошася, горько поглотити мя: но Ты Богородице, явися надежда ненадеющимся, и низложи крепость их Благословенная.

**И ныне:** Да узрят врази и постыдятся, да разумеют и видят Твою, еже по нам сопротив борющую силу, и в пропасть преисподнюю низложи их Благословенная, надеждо ненадеющих.

### Песнь 8

**Ирмос:** Пещь иногда огненная в Вавилоне действия разделяше, \* Божиим велением халдеи опаляющая, \* верныя же орошающая, поющие: \* благословите вся дела Господня \* Господа.

**Прибежище** наше, и миру радование, Богородительнице, умилосердитесь потщися, и спешно благодать Твою подаждь нам оскорбленным, и заступи Благая, Твоя рабы.

**Совет** суетен совещаша люте на ны безбожных сонмища, якоже прежде Ахитофел. Но вопием: Твоими молитвами сей разори, низложши сих крепость Богородице.

**Слава:** Призывающих Тя Богородице, от души неложно, во всякой скорби и в болезнях различных, и бедах лютых, спешно услыши Владычице, сих избавляющи присно молитвами Твоими.

**И ныне:** Да имя Твое Богородице, на земли славословится, Иже из Тебе возсияв, грешником державную надежду и стену Тя дарова: Тобою бо всякое дыхание к Богу притекает.

### Песнь 9

**Ирмос:** Недоумеет всяк язык благохвалити по достоянию, \* изумевает же ум и премірный пети Тя Богородице: \* обаче Благая сущи, \* веру приими, \* ибо любовь веси божественную нашу, \* Ты бо христиан еси Предстательница, Тя величаем.

**Да** заградится всяк язык, лукавым поучаяйся: да молчат устна льстивая, и уста неправедно глаголющая на праведнаго беззаконие, гордынею и завистию враждебною вкупе, Богородицы молитвою, и святых Христовых.

**Иже** в молитвах бодрую, Чистую Богородицу, призываем вси болезнию и скорбию одержими, взывающе: Владычице Чистая, скоро избави от одержавших болезней рабы Твоя присно, яко по Бозе заступницы иныя не имамы.

**Слава:** Отчаявшихся велие прибежище, обуреваемых тихое пристанище, Ты еси Богородице. Темже и мы притекаем, взывающе: да не постыдимся Мати Истиннаго Живота, но да благодаряще усердно Тя величаем.

**И ныне:** Приими, Отроковице Пречистая, божественную песнь, воздаваючи благодать на Тя надеющимся, и мир испроси церквам присно послати, да христианский всяк язык Тя величает.

**Таже:** Достойно есть: Трисвятое. Кондак воскресен, и отпуст.

## В НЕДЕЛЮ НА ПОЛУНОЩНИЦЕ,

Канон ко Святей и Живоначальной Троице, егоже краестрочие:  
Тригубый пою Богоначалия свет. Глас 2.

Творение Митрофаново

### Песнь 1

**Ирмос:** Во глубине постаа иногда, \* фараонитское всевоинство преоруженная сила, \* воплощенное же Слово \* всезлобный грех потребило есть: \* Препрославленный Господь славно бо прославился.

**Припев:** Пресвятая Троице Боже наш, слава Тебе.

Троичное и Единоначальное Естество Божества, песненно воспоем глаголюще: милости пучину неизчерпаемую, существенную яко имущи, Тебе кланяющихся соблюди и спаси, яко Человеколюбец.

**И**же источник, и корень Отец сый, яко виновен, Иже в Сыне, и Святем Твоем Дусе, срасленного Божества Трисолнечный сердцу моему источи свет, и причастием осияй, Богодетельного сияния.

**Слава:** Трисветлая Единице Богоначальная, весь разори грехов и страстей моих мрак, светлых лучей Твоих сладчайшими причащеньми, и сотвори мя Твоя неприступная славы храм и сень пречистую.

**Богородичен:** Ток древний естества нашего, страдавший безместно, и к тли поползшийся Пречистая, воплещься во утробе Твоей Бог Слово, человеколюбне осия, и Богоначалию Трисветлому нас тайно научи.

### Песнь 3

**Ирмос:** На камени мя веры утвердив, \* разширил еси уста моя на враги моя, \* возвесели бо ся дух мой, внегда пети: \* несть свят, якоже Бог наш, \* и несть праведен паче Тебе Господи.

**Р**авенством естества Богоначалие Единочестное славлю Тя Лицы: Живот бо от Живота Ты произшед нетленно, Един сый Бог наш, и несть свят, паче Тебе Господи.

**Т**ы чины невещественныя и небесныя составил еси, яко зеркала Твоя доброты: Троице Нераздельное Единоначалие, пети непрестанно Тебе: но и ныне наше от бранных уст приими хваление.

**Слава:** Утверди на камени веры, и разшири любве Твоя пучиною сердца и мысль Твоих раб, Единице Трисолнечная: Ты бо Бог наш, на Негоже уповающе, да не посрамимся.

**Богородичен:** Иже всяк прежде состав осуществовавый твари, во утробе Твоей осуществовася, неизчетною благостию Богородице, и свет Трисолнечный всем возсия Единого Божества и Господства.

Седален, глас 2

**Подобен:** Благоутробия:

**Е**гда в начале Адама создал еси Господи, \* тогда Слову Твоему Ипостасному возопил еси Благоутробне: \* сотворим по Нашему подобию, \* Дух же Святыи соприсуществоваше Содетель. \* Темже вопиеш Ти: \* Творче Боже наш, слава Тебе.

#### Слава, и ныне, Богородичен:

**Е**гда к нам Бог приити изволи, \* тогда в Твою Пречистая, чистейшую утробу вселися, \* и спасе Тобою человеческое смешение, \* даровавый всем Царство Небесное. \* Темже вопиеш Ти, \* Богородице Чистая, радуйся Владычице.

#### Песнь 4

**Ирмос:** Пою Тя, слухом бо Господи услышах и ужасохся, до мене бо идеши, мене ища заблуждшаго. Тем многое Твое снисхождение, еже на мя, прославляю Многомилостиве.

**Р**азумети Тя ниже чиновне могут невестественнии ангельстии, Единице, Троице Безначальная: но убо мы бранным языком Твою Существенную благодать воспеваем, и верою славим.

**С**ый Создатель естества человеческого, Вседержителю, все мое видиши ныне, яко Всевидец немощие: темже ущедри раба Твоего, и к жизни лучшей паки возведи.

**Слава:** Единицы Начальныя несмесна Три Лица воспеваем, яко свойственне имущая, и раздельне Ипостаси: но убо Соединена и Нераздельна, в Совете же и Славе, и Божестве.

**Богородичен:** Храм Тя чист и пренепорочен, Приснодево Богородице, Вседетель обрете Едину яве от века, в Нюже вселься: вообрази человеческое естество, яко Человеколюбец.

#### Песнь 5

**Ирмос:** Просвещение во тьме лежащих, \* спасение отчаянных Христе Спасе мой, \* к Тебе утреннюю Царю мира, \* просвети мя сиянием Твоим: \* иного бо разве Тебе Бога не знаю.

**Я**ко всячески на вся сущия Твоего промысла, миродарныя простираяй лучы, и спасительныя, Царю мира, соблюди мя в мире Твоем: Ты бо живот и мир всяческому.

**М**оисею в купине яко явился еси в видении огненне, ангел нареклся еси Отчее Слово, Еже к нам Твое предъявляя пришествие: Имже всем яве возвестил еси державу Богоначалия Единаго, Триипостасную.

**Слава:** Яже Естественную, Соприсносущную славу предложиши, Единоначальнейшая Троице Святая, воспевающих Тя православною верою, Твоя славы видети сподоби, Безначальную, и Едину зарю Трисолнечную.

**Богородичен:** Содержительный по существу сый Бог Слово, всем веком, Дево Мати, во чреве Твоем удержася неизреченно, человеки призывая ко единству Единаго Господства.

#### Песнь 6

**Ирмос:** В бездне греховней валяясь, \* неизследную милосердия Твоего призываю бездну: \* от тли Боже мя возведи.

Волителю милости, помилуй в Тя верующих, Боже Трисолнечне, и прегрешений избави, и страстей, и бед, рабы Твоя. [Дважды]

**Слава:** Неизреченною пучиною благодати, необмыслимую Твоего сияния, и Трисияннаго Божества светодательную зарю подаждь ми.

**Богородичен:** Неизреченне Дево, Вышний Человек бысть из Тебе, в человека по всему оболкся, и светом мя Трисолнечным озари.

Седален, глас 2.

Подобен: Благоутробия:

Благоутробия пучину нам прострый, \* прими нас Милостиве, \* призри на люди Тя славящия, \* прими песнь просящих Тя, \* Троице Единице Безначальная: \* на Тя бо уповаем всех Бога, \* прегрешений дати прощение.

Слава, и ныне, Богородичен:

Благоутробия рождши Источник, \* милостива Ты еси Благая Богородице: \* Ты бо верных едино заступление, \* Ты скорбящих утешение. \* Темже Тебе ныне вси верою припадаем, \* обрести разрешение лютых, \* обогатеющися единою Тебе помощию.

Песнь 7

**Ирмос:** Образу златому на поле деире служиму, \* трие Твои отроцы небрегоша безбожнаго веления: \* посреде же огня ввержени, \* орошаеми пояху: \* благословен еси Боже отец наших.

Уставляеши присно ангельская воинства к непреложению, Едине сый Неизменне и Триипостасне Господи: покажи убо и мое сердце непреложно всегда, во еже славити Тя тепле, и воспевати благочестно. [Дважды]

**Слава:** Лицы умнии невестественных существ, Твоими лучами Боже Единоначальне, и Трисолнечне, озаряеми бывают, положением втории светове: ихже и мене сияньми, и причастием покажи свет, яко Светодетель Трисиянен.

**Богородичен:** Направляти нас и возвышати к небесем не оскудей, Тебе любящих, иже за неизреченное человеколюбие, быв человек во утробе Девы, и обожив человека, и на престоле славы со Отцем седяй.

Песнь 8

**Ирмос:** О подобии злате небрегше \* треблаженнии юноши, \* неизменный и живой Божий образ видевшю, \* среди огня воспеваху: \* осуществованная да поет Господа вся тварь, \* и превозносит во вся веки.

Неприступная Троице Соприсносущная, Собезначальная, Богоначальная, Неизменная во всех, кроме Светоносных Свойств, всякий лукавый упраздни сопротиволежащих совет, и стужения демонов, невредна соблюдаяй мя присно, Господи всех. [Дважды]

**Слава:** Премудре и Всемощне, Неописанное, Трисолнечное Единоначалие составлявшее мир, и соблюдающее в невредимом чине всесовершенном, вселися в мое сердце, пети и славити Тя немолчно с лики ангельскими во вся веки.

**И ныне:** Премудросте Отчая, Непостижиме, Неизреченне, Божий Слове, Непреложное Твое Естество не изменив, естество человеческое милостивне восприял еси: и Единственную Троицу чести всех научил еси, яко Господоначалие всех веков.

### Песнь 9

**Ирмос:** Яже прежде солнца светильника \* Бога возсиявшего, \* плотски к нам пришедшаго, \* из боку Девичу неизреченно воплотившая, \* Благословенная Всечистая, \* Тя Богородице величаем.

**От** Света Безначальна, Собезначален Сын Свет возсия, и Соестественный Дух изыде, неизреченно боголепно, нетленну рождеству уверяеми, вкупе же и неизреченному исхождению.

**Возсияй** в сердцах Трисолнечное Божество, воспевающих Тя, Трисианным Светом Твоим: и даждь разум еже во всех разумети, и деяти Твое хотение благое и совершенное, и величати и славити Тя.

**Слава:** Неизчетен естеством сый яко Бог, неизчетную пучину щедрот яко имея, ущедрила еси Троице прежде: тако и ныне ущедри рабы Твоя, и от прегрешений избави, и напастей и обстояний.

**Богородичен:** Спаси мя Боже мой, от всякаго искушения и озлобления, Иже в Трех Лицах воспеваемый несказанно, Единственне Бог и Всесильный, и Твое стадо сохрани, Богородицы молитвами.

Таже троичны Григория Синаита. Достойно есть: И прочее полунощницы.

## НА УТРЕНИ

По шестопсалмии Бог Господь, на глас 2 ый глаголем тропарь воскресный, и Богородичен

Тропарь воскресен, глас 2:

Егда снизшел еси к смерти Животе Безсметный, \* тогда ад умертвил еси блистанием Божества: \* егда же и умершья от преисподних воскресил еси, \* вся силы небесныя зываху: \* Жизнодавче Христе Боже наш, слава Тебе. [дважды],

Богородичен:

Вся паче смысла, \* вся преславная Твоя Богородице, таинства, \* чистоте запечатанной и девству храниму, \* Мати позналася еси неложна, \* Бога рождши Истиннаго: \* Того моли спастися душам нашим. [единожды],

Таже обычное стихословие псалтиря.

По 1-м стихословии, седальны воскресны, глас 2:

Благообразный Иосиф, с древа снем Пречистое Твое тело, \* плащаницею чистою обвив, \* и благоуханьми во гробе нове закрыв положи: \* но тридневен воскресл еси Господи, \* подая миру велию милость.

Стих: Воскресни Господи Боже мой, да вознесется рука Твоя \* не забуди убогих Твоих до конца.

Мүроносицам женам при гробе представ ангел вопияше: \* мвра мертвым суть прилична, \* Христос же истления явися чуждь. \* Но возопийте: \* воскресе Господь, подая миру велию милость.

Слава, и ныне, Богородичен:

Препрославленна еси Богородице Дево, поем Тя: \* Крестом бо Сына Твоего низложися ад, \* и смерть умертвися, \* умерщвлении востахом, \* и животе сподобихомся: \* рай восприяхом древнее наслаждение. \* Тем благодаряще, \* славословим яко Державнаго Христа Бога нашего, \* и Единаго Многомилостиваго.

По 2-м стихословии седальны, глас 2

Камень гробный запечатати \* не возбранив, \* камень веры воскрес подал еси всем, \* Господи слава Тебе.

Стих: Исповемся Тебе Господи всем сердцем моим \* повем вся чудеса Твоя.

Учеников Твоих лик с мүроносицами женами \* радуется согласно: \* общий бо праздник с ними празднуют, \* в славу и честь Твоего Воскресения. \* И теми вошем Ти, \* Человеколюбче Господи: \* людем Твоим подаждь велию милость.

Слава, и ныне, Богородичен:

Преблагословенна еси Богородице Дево, \* воплощшим бо ся из Тебе ад пленися, \* Адам возвася, клятва потребися, \* Ева свободися, \* смерть умертвися, и мы ожихом. \* Тем воспевающе вошем: \* благословен Христос Бог благоволивый тако, слава Тебе.

Таже, Блажени непорочнии:

Посем тропари: Ангельский собор:

## По непорочнах ишакои, глас 2

**По** страсти шедши во гроб жены, \* во еже помазати тело Твое Христе Боже, \* видеша ангелы во гробе, \* и ужасошася: \* глас бо слышаху от них, \* яко воскрес Господь, \* даруя миру велию милость.

### Степенна, глас 2

#### Антифон 1. Ихже стихи повторяюще поем:

**На** небо очи пуцаю моего сердца, \* к Тебе Спасе, \* спаси мя Твоим осиянием.

**Помилуй** нас согрешающих Тебе много, \* на всякий час, \* О Христе мой, \* и даждь образ прежде конца покаяться Тебе.

**Слава:** Святому Духу, \* Еже царствовать подобает, \* освящати, подвизати тварь: \* Бог бо есть, \* Единосущен Отцу и Слову.

**И ныне, тойже.**

#### Антифон 2:

**Аще** не Господь бы был в нас, \* кто доволен цел сохранен быти от врага, \* купно и человекоубийцы?

**Зубом** их не предаждь Спасе, \* Твоего раба: \* ибо львовым образом на мя \* подвизаются врази мои.

**Слава:** Святому Духу живоначалие и честь: \* вся бо созданная, \* яко Бог сый силою \* соблюдает во Отце, Сыном же.

**И ныне, тойже.**

#### Антифон 3:

**Надеющиеся** на Господа, \* уподобишася горе святых: \* иже никакоже движутся \* прилоги вражиими.

**В** беззаконии рук своих да не прострут божественне живущии: не оставляет бо Христос жезла на жребии Своем.

**Слава:** Святым Духом точится всяка премудрость: отсюда благодать апостолом, и страдальчества венчаются мученицы, и пророцы зрят.

**И ныне, тойже.**

**Прокимен, глас 2:** Востани Господи Боже мой повелением. имже заповедал еси, \* и сонм людей обыдет Тя.

**Стих:** Господи Боже мой на Тя уповах, спаси мя.

**Всякое дыхание:**

Евангелие воскресно, и прочая по ряду.

**Воскресение** Христово видевшие, \* поклонимся Святому Господу Иисусу, \* Единому Безгрешному. \* Кресту Твоему покланяемся Христе, \* и Святое Воскресение Твое поем и славим: \* Ты бо еси Бог наш, \* разве Тебе иного не знаем, \* Имя Твое именуем. \* Приидите вси вернии, \* поклонимся Святому Христову воскресению: \* се бо прииде Крестом радость всему міру. \* Всегда благословяще Господа, \* поем Воскресение Его: \* распятие бо претерпев, \* смертию смерть разруши.

**Псалом 50: Помилуй** мя Боже:

**Слава:** Молитвами апостолов, \* Милостиве, очисти \* множества согрешений наших.

**И ныне:** Молитвами Богородицы, \* Милостиве, очисти \* множества согрешений наших.

**Таже, глас 6:** Помилуй мя Боже \* по велицей милости Твоей, \* и по множеству щедрот Твоих \* очисти беззаконие мое.

**Посем стихира:**

**Воскрес** Иисус от гроба, \* якоже прорече, \* даде нам живот вечный, \* и велию милость.

**Таже, Спаси** Боже люди Твоя:

**И возглас:** Милостию и щедротами и человеколюбием:

**Каноны:** воскресный на 4: крестовоскресный на 3: и Богородичен на 3: Минеи на 4.

**Аще же празднуется святой,** на 6: крестовоскресный на 2, и Богородицы на 2.

**Канон воскресен. Глас 2.**

**Песнь 1**

**Ирмос:** Во глубине постла иногда, \* фараонитское всевоинство преоруженная сила, \* воплощенное же Слово \* всезлобный грех потребило есть: \* Препрославленный Господь \* славно бо прославился.

**Припев:** Слава Господи святому Воскресению Твоему.

**Мірский князь** Блаже, емуже написахомся, заповеди Твоя не послушавше, крестом Твоим осудися: приразися бо Ти яко смертну: отпаде же власти Твоя державою, и немощный обличися.

**Припев:** Слава Господи святому Воскресению Твоему.

**Избавитель** рода человеческого, и нетленному животу Начальник в мір пришел еси: Воскресением бо Твоим раздрал еси смертныя пелены, Еже славословим вси: славно бо прославился.

**Припев:** Пресвятая Богородице спаси нас.

**Богородичен:** Превышши явилася еси Чистая Приснодево, всякия невидимыя же и видимыя твари: Зиждителя бо родила еси, яко благоволи воплотитися во утробе Твоей, Егоже со дерзновением моли, спасти души наша.

**Ин канон, крестовоскресный**

**Егоже краестрочие:** Пою хвалу Живоносному Слову: Глас 2

### Песнь 1

**Ирмос:** Нетрену, необычну, \* немокренно морскую шествовав стезю, \* избранный вопияше Израиль: \* Господеви поим, \* яко прославися.

**Припев:** Слава Господи Кресту Твоему честному и Воскресению.

Сила немощных, Воскресение падших, и нетление умерших был еси Христе, плоти Твоя страстию: яко прославися.

**Припев:** Слава Господи Кресту Твоему честному и Воскресению.

Ущедри падший образ, и воскреси сокрушенный, Содетель Бог и Обновитель умерщвлен быв всех оживи: яко прославися.

Ин канон Пресвятей Богородице,  
[егоже краестрочие: Пою хвалу Живоносней Отроковице]

Глас 2

### Песнь 1

**Ирмос:** Нетрену, необычну, \* немокренно морскую шествовав стезю, \* избранный вопияше Израиль: \* Господеви поим, \* яко прославися.

**Припев:** Пресвятая Богородице спаси нас.

Невещественная древле лествица, и странно оледеневший путь моря, Твое являше Рождество Чистая, еже поим вси: яко прославися.

**Припев:** Пресвятая Богородице спаси нас.

Сила Вышняго, Ипостась Совершенная, Божия Мудрость, воплощися Пречистая, из Тебе, к человеку беседова: яко прославися.

**Припев:** Пресвятая Богородице спаси нас.

Пройде сквозе дверь непроходную, заключенныя утробы Твоя, правды Солнце Чистая, и мiрови возсия: яко прославися.

**Катавасия:** Отверзу уста моя ...,

### Песнь 3

**Ирмос:** Процвела есть пустыня, яко крин, Господи, \* языческая неплодящая церковь, пришествием Твоим, \* в нейже утвердися мое сердце.

**Припев:** Слава Господи святому Воскресению Твоему.

Тварь в страсти Твоей изменяшеса, зряци Тя в нищетне образе от беззаконных поругаема, основавшаго вся Божественным мановением.

**Припев:** Слава Господи святому Воскресению Твоему.

От персти по образу мя рукою Твоею создал еси: и сокрушенна паки в персть смертную за грех, Христе сошед во ад, совоскресил еси.

**Припев:** Слава Господи святому Воскресению Твоему.

Богородичен: Чини удивишася ангельстии Пречистая, и человеческая устрашишася сердца о Рождестве Твоем: темже Тя Богородицу верою чтим.

Ин, Кресту :

**Ирмос:** Лук сокрушился \* сильных державою Твоею Христе, \* и силою немощствующих \* препоясашася.

**Припев:** Слава Господи Кресту Твоему честному и Воскресению.

**И**же всех вышши Христос, умалися малым чим, страстию плотскою, ангельскаго естества.

**Припев:** Слава Господи Кресту Твоему честному и Воскресению.

**М**ертв со беззаконными вменився, сияя женам венцем славы Христе, явился еси от Воскресения.

**Ин, Богородице :**

**Ирмос:** Лук сокрушился \* сильных державою Твоею Христе, \* и силою немощствующих \* препоясашася.

**Припев:** Пресвятая Богородице спаси нас.

**И**же време преувышшии всякаго, яко временем Творец, из Тебе Дево волею Младенец создася.

**Припев:** Пресвятая Богородице спаси нас.

**Ч**рево пространнейшее небес воспойм, имже Адам на небесех радуяся живет.

**Песнь 4**

**Ирмос:** Пришел еси от Девы, \* не ходатай, ни ангел, \* но Сам Господи воплощься, \* и спасл еси всего мя человека. \* Тем зову Ти: \* слава силе Твоей Господи.

**Припев:** Слава Господи святому Воскресению Твоему.

**П**редстоиши судищу яко судимь, Боже мой, не вопия Владыко, суд износя языком: имже страстию Твоею Христе вселенней соделал еси спасение.

**Припев:** Слава Господи святому Воскресению Твоему.

**С**трастию Твоею Христе, врагу оскудеша оружия, противным же еже во ад схождением Твоим, грады разрушишася, и мучителява дерзость низложена бысть.

**Припев:** Пресвятая Богородице спаси нас.

**Богородичен:** Тя пристанище спасения, и стену недвижиму, Богородице Владычице, вси вернии свемь: Ты бо молитвами Твоими избавляеши от бед души наша.

**Ин, Кресту :**

**Ирмос:** Услышах Господи, \* славное Твое смотрение, \* и прославих Человеколюбче, \* непостижимую Твою силу.

**Припев:** Слава Господи Кресту Твоему честному и Воскресению.

**В**идевши на древе Тя Христе пригвождена Дева, Яже неболезненно Тя рождающая, матерски болезни претерпе.

**Припев:** Слава Господи Кресту Твоему честному и Воскресению.

**П**обеждена бысть смерть, мертв пленяет адова врата: всеядцу бо разоршуся, яже паче естества вся ми даровашася.

Ин, Богородице :

**Ирмос:** Услышах Господи, \* славное Твое смотрение, \* и прославих Человеколюбче, \* непостижимую Твою силу.

Припев: Пресвятая Богородице спаси нас.

Се превознесся Божественная Гора дому Господня, превышше сил, Богоматерь явственнейше.

Припев: Пресвятая Богородице спаси нас.

Законов естественных кроме, Едина Дево рождши владычествующаго тварию, сподобилася еси Божественнаго звания.

Песнь 5

**Ирмос:** Ходатай Богу и человеком был еси Христе Боже: \* Тобою бо Владыко, \* к Светоначалику Отцу Твоему, \* от ноши неведения, \* приведение имамы.

Припев: Слава Господи святому Воскресению Твоему.

Яко кедры Христе, языков шатание сокрушил еси волею Владыко: яко изволил еси на кипарисе, и на певке, и кедре, плотию совозвышаемь.

Припев: Слава Господи святому Воскресению Твоему.

В рове Христе преисподнем положиша Тя бездыханна мертва: но Твоею язвою забвенныя мертвыя, иже во гробех спящия, уязвен с Собою воскресил еси.

Припев: Пресвятая Богородице спаси нас.

Богородичен: Моли Сына Твоего и Господа, Дево Чистая, на Тя уповающим мир даровати, плененным избавление, от сопротивных настояний.

Ин, Кресту :

**Ирмос:** Угль Исаии проявлейся, \* Солнце из девственныя утробы возсия, \* во тьме заблуждшым, \* богоразумия просвещение даруя.

Припев: Слава Господи Кресту Твоему честному и Воскресению.

Постити отвергийся Адам, вкушает смертоноснаго древа первый: но сего грех потребляет, распныйся Второй.

Припев: Слава Господи Кресту Твоему честному и Воскресению.

Естеством человеческим страстен же и смертен был еси, Иже безстрастный невестственным Божеством, обезтливый умерщвленныя Христе, от преисподних адовых воскресил еси.

Ин, Богородице :

**Ирмос:** Угль Исаии проявлейся, \* Солнце из девственныя утробы возсия, \* во тьме заблуждшым, \* богоразумия просвещение даруя.

Припев: Пресвятая Богородице спаси нас.

Облацы веселия сладость кропите сущым на земли: яко Отроча дадеса, Иже сый прежде век, от Девы воплощся Бог наш.

**Припев:** Пресвятая Богородице спаси нас.

**Ж**итию и плоти моей свет возсия, и дряхлость греха разруши: напоследок от Девы без семени воплощся Вышний.

### Песнь 6

**Ирмос:** В бездне греховней валяясь, \* неизследную милосердия Твоего призываю бездну: \* от тли Боже мя возведи.

**Припев:** Слава Господи святому Воскресению Твоему.

**Я**ко злодей Праведник осудися и со беззаконными на древе пригвоздися, повинным оставление Своею даруя кровию.

**Припев:** Слава Господи святому Воскресению Твоему.

**Е**динем убо человеком, первым Адамом древле в мир вниде смерть, и Единем Воскресение Сыном Божиим явися.

**Припев:** Пресвятая Богородице спаси нас.

**Богородичен:** Неискусомужно Дево родила еси, и вечнуеши Дева, являющи Истиннаго Божества, Сына и Бога Твоего образы.

### Ин, Кресту :

**Ирмос:** Глас глагол молебных от болезненныя Владыко, \* души услышав, \* от лютых мя избави: \* Един бо еси нашего спасения виновен.

**Припев:** Слава Господи Кресту Твоему честному и Воскресению.

**Б**люстителю положил еси падшему, херувимы древа животнаго, но видевши Тя, двери отверзошася: явилася бо еси путетворя разбойнику в рай.

**Припев:** Слава Господи Кресту Твоему честному и Воскресению.

**П**уст ад и испровержен бысть смертию Единаго: еже бо многое богатство сокровиществова, Един о всех нас Христос истощил есть.

### Ин, Богородице :

**Ирмос:** Глас глагол молебных от болезненныя Владыко, \* души услышав, \* от лютых мя избави: \* Един бо еси нашего спасения виновен.

**Припев:** Пресвятая Богородице спаси нас.

**Е**стество человеческое работающее греху, Владычице Чистая, Тобою свободу улучи: Твой бо Сын, яко агнец, за всех закалается.

**Припев:** Пресвятая Богородице спаси нас.

**В**опием Ти вси истинней Богоматери, прогневавшыя рабы избави: Едина бо дерзновение к Сыну имаши.

### Кондак, глас 2:

**В**оскресл еси от гроба Всесильне Спасе, \* и ад видево чудо, ужасеся, \* и мертвии восташа: \* тварь же видящи срадуется Тебе, \* и Адам свеселится, \* и мир Спасе мой воспевае Тебя присно.

**Икос:** Ты еси Свет омраченным, Ты еси Воскресение всех, и Живот человеков, и всех совоскресил еси, смертную державу Спасе разорь, и адова врата сокрушивый Слове: и мертвии видевшие чудо чудяхуся, и всяка тварь срадуется о Воскресении Твоем Человеколюбче. Темже и вси славим и поем Твое низхождение, и мир Спасе мой, воспеваает Тя присно.

### Песнь 7

**Ирмос:** Богопротивное веление \* беззаконнующаго мучителя высок пламень вознесло есть: Христос же простре богочестивым отроком росу духовную, Сый благословен, и препрославлен.

**Припев:** Слава Господи святому Воскресению Твоему.

Не терпел еси Владыко, за благоутробие смертию человека зрети мучима, но пришел и спас еси Твоею кровию, человек быв: Сый благословен, и Препрославлен Бог отец наших.

**Припев:** Слава Господи святому Воскресению Твоему.

Видевше Тя Христе, оболчена во одежду отмщения, ужасошася вратницы адовы: безумнаго бо мучителя раба, Владыко, пришел еси убити: Сый благословен и Препрославлен Бог отец наших.

**Припев:** Пресвятая Богородице спаси нас.

**Богородичен:** Святых Святейшую Тя разумеем, яко Едину рождшую Бога Непременнаго, Дево Нескверная, Мати Безневестная: всем бо верным источила еси нетление, Божественным Рождеством Твоим.

### Ин, Кресту :

**Ирмос:** Ветии явишася отроцы, любомудрейшии древле: \* от богоприятныя бо души богословяще, \* устнами пояху: \* Пребожественный отец и наш \* Боже благословен еси.

**Припев:** Слава Господи Кресту Твоему честному и Воскресению.

Осуди праотца древле во Едеме преслушание: но волею судимь бысть, преступльшему разрешая прегрешения, Пребожественный отец Бог, и Препрославлен.

**Припев:** Слава Господи Кресту Твоему честному и Воскресению.

Спас еси узвеннаго языком, завистию человекоубийцы, во Едеме вольным угрызением: вольною бо страстию исцелил еси, Пребожественный отец Бог, и Препрославлен.

**Припев:** Пресвятая Богородице спаси нас.

**Богородичен:** Ходяща мя в сени смертней призвал еси к свету, темнотный ад, блистанием облож Божества, Пребожественный отец Бог, и Препрославлен.

### Ин, Богородице :

**Ирмос:** Ветии явишася отроцы, любомудрейшии древле: \* от богоприятныя бо души богословяще, \* устнами пояху: \* Пребожественный отец и наш \* Боже благословен еси.

**Припев:** Пресвятая Богородице спаси нас.

**З**ряще в нощи убо Иаков, яко в гадании Бога воплощенна, из Тебе же светлостию явися поющим: Пребожественный отцев Бог, и Препрославлен.

**Припев:** Пресвятая Богородице спаси нас.

**З**намения яже в Тебе, неизреченного проявляя снятия, со Иаковом борется: имже волею соединиися человеком Чистая: Пребожественный отцев Бог, и Препрославлен.

**Припев:** Пресвятая Богородице спаси нас.

**М**ерзок иже не проповедует Тя Девы Сына, Единого от Препетия Троицы несумненною верою, и языком вопия: Пребожественный отцев Бог, и Препрославлен.

### Песнь 8

**Ирмос:** Пещь иногда огненная в Вавилоне действия разделяше, \* Божиим велением халдеи опаляющая, \* верныя же орошающая, поющыя: \* благословите вся дела Господня Господа.

**Припев:** Слава Господи святому Воскресению Твоему.

**К**ровию Твоею Христе, очервлено плоти Твоя зряще одеяние, трепетом ужасохуся многому Твоему долготерпению, ангельстии чини, зовуще: благословите вся дела Господня Господа.

**Припев:** Слава Господи святому Воскресению Твоему.

**Т**ы мое смертное одеял еси Щедре, в бессмертие востанием Твоим. Темже веселящися благодарственно воспевают Тя избранныи людие Христе, зовуще Тебе: пожерта бысть воистинну смерть победою.

**Припев:** Пресвятая Богородице спаси нас.

**Богородичен:** Ты Иже Отцу неразлучнаго, во утробе богомужно поживша безсеменно зачала еси, и неизреченно родила еси Богородительнице Пречистая: темже Тя спасение всех нас свемы.

### Ин, Кресту :

**Ирмос:** О подобии злате, \* небрегше треплаженнии юноши, \* неизменный и живой Божий образ видевшие, \* среди огня воспеваху: \* осуществованная да поет Господа вся тварь, \* и превозносит во вся веки.

**Припев:** Слава Господи Кресту Твоему честному и Воскресению.

**В**иден был еси на кресте пригвождаемь, Иже богатый в милости, волею погреблся еси: и тридневно воскресл еси, и избавил еси вся человеки Человеколюбче, верою поющыя: да поет Господа вся тварь, и превозносит во вся веки.

**Припев:** Слава Господи Кресту Твоему честному и Воскресению.

**И**збавити от исления, сошед в преисподняя Слове Божий, егоже создал еси Христе, силою Твоею Божественною, и без исления сотвори, славы присносущныя Твояя причастника соделал еси, да поет, зовущи, вся тварь, и превозносит во вся веки.

Ин, Богородице :

**Ирмос:** О подобии злате, \* небрегше треблаженнии юноши, \* неизменный и живой Божий образ видевше, \* среди огня воспеваху: \* осуществованная да поет Господа вся тварь, \* и превозносит во вся веки.

Припев: Пресвятая Богородице спаси нас.

Виден бысть на земли Тобою, и с человеки поживе, Иже благию несравненный и силою, Емуже поюще вси вернии зовем: осуществованная да поет Господа вся тварь, и превозносит во вся веки.

Припев: Пресвятая Богородице спаси нас.

Воистинну Тя Чистую проповедающе славим Богородицу: Ты бо родила еси от Троицы воплощенна, Емуже со Отцем и Духом вси поем: да поет Господа вся тварь, и превозносит во вся веки.

Таже, поем песнь Богородицы: Величит душа моя Господа:

С припевом: Честнейшую херувим:

Песнь 9

**Ирмос:** Безначальна Родителя Сын, Бог и Господь, \* воплощься от Девы нам явися, \* омраченная просветити, собрати расточенная: \* тем Всепетую Богородицу \* величаем.

Припев: Слава Господи святому Воскресению Твоему.

Яко в раи насаждено на лобнем Спасе, требогатое древо Твоего пречистаго Креста, кровию и водою Божественною, яко от источника Божественнаго, ребра Твоего Христе, напояемо, живот нам прозябло есть.

Припев: Слава Господи святому Воскресению Твоему.

Низложил еси сильныя, распныйся Всесильне, и еже низу лежащее во адове твердыни, естество человеческое вознес, на Отчем посадил еси престоле. С Нимже Тебе грядущу покланяющесе, величаем.

Припев: Благословим Отца и Сына и свягаго Духа Господа.

Троицен: Единицу Тричисленную, Троицу Единосущную православно поюще вернии, славим: непресекомо Пребожественное Естество, Трисветлую, Невечернюю Зарю, Едину нетленную нам свет Возсиявшую.

Ин, Кресту :

**Ирмос:** От Бога Бога Слова ...,

Припев: Слава Господи Кресту Твоему честному и Воскресению.

Посреде осужденных, яко Агнец возвышен был еси Христе, на кресте, на лобнем копием в ребро прободаемь, живот даровал еси нам перстным яко благ, верою чтущым Божественное Твое Воскресение.

Припев: Слава Господи Кресту Твоему честному и Воскресению.

Иже Своею смертию, смерти державу силою упразднившему Богу вси вернии поклонимся, яко иже от века мертвыя совоскреси, и всем подает живот и Воскресение.

Ин, Богородице :

**Ирмос:** **Весь еси желание, весь сладость, \* Слове Божий, Девы Сыне, \* Боже богов, \* Господи, святых Пресвятый. \* Тем Тя вси с рождшею величаем.**

**Припев:** Пресвятая Богородице спаси нас.

**Ж**езл крепости дадеся естеству тленному, Слово Божие во утробе Твоей Чистая: и сие воскреси, до ада поползшееся. Темже Тя Всечистая, яко Богородицу величаем.

**Припев:** Пресвятая Богородице спаси нас.

**Ю**же изволил еси Владыко, прими милостивно Молитвенницу, Матерь Твою о нас, и Твоя благодати всяческая исполняется: да Тя вси яко Благодетеля величаем.

**По катавасии ектенна малая. Таже, Свят Господь Бог наш: трижды.**

**Посем екзапостиларий утренний.**

**На хвалитех стихиры воскресны, глас 2:**

**Стих:** Сотворити в них суд написан: \* слава сия будет всем преподобным Его.

**В**сякое дыхание и вся тварь Тя славит, Господи, яко Крестом смерть упразднил еси, да покажешаи людем, еже из мертвых Твое Воскресение, яко Един Человеколюбец.

**Стих:** Хвалите Бога во святых Его, \* хвалите Его в утверждении силы Его.

**Д**а рекут иудее, како воины погубиша стрегущии Царя? почто бо камень не сохрани Камене жизни? Или Погребеннаго да дадят, или Воскресшему да поклонятся, глаголюще с нами: слава множеству щедрот Твоих, Спасе наш, слава Тебе.

**Стих:** Хвалите Его на силах Его, \* хвалите Его по множеству величества Его.

**Р**адуйтесь людие и веселитесь, ангел седяй на камени гробнем, той нам благовести, рек: Христос воскресе из мертвых, Спас мира, и исполни всяческая благоухания: радуйтесь людие и веселитесь.

**Стих:** Хвалите Его во гласе трубнем: \* хвалите Его во псалтири и гуслех.

**А**нгел убо еже радуйся, прежде Твоего зачатия Господи, Благодатней принесе: ангел же камень славнаго Твоего гроба в Твое Воскресение отвали: ов убо в печали место, веселия образы возвещая: сей же в смерти место, Владыку Жизнодавца проповедуя нам, темже вопием Ти: Благодетелю всех, Господи слава Тебе.

**Ины стихиры, Анатолиевы, глас 2:**

**Стих:** Хвалите Его в тимпане и лице, \* хвалите Его во струнах и органе.

**В**озлияша мѹра со слезами на гроб Твой жены, и исполнишася радости уста их, внегда глаголати: воскресе Господь.

**Стих:** Хвалите Его в кимвалех доброгласных, \* хвалите Его в кимвалех восклицания: всякое дыхание да хвалит Господа.

**Да** похвалят языцы и людие Христа Бога нашего, волею нас ради Крест претерпевшаго, и во аде тридневновавшаго: и да поклонятся Его из мертвых Воскресению, Имже просветишася всего мiра концы.

**Стих:** Воскресни Господи Боже мой, да вознесется рука Твоя, \* не забуди убогих Твоих до конца.

**Распят** и погребен был еси Христе, якоже изволил еси, испроверг л еси смерть, и воскресл еси во славе, яко Бог и Владыка, даруя мiрови жизнь вечную и велию милость.

**Стих:** Исповемся Тебе Господи всем сердцем моим, \* повем вся чудеса Твоя.

**О** воистинну беззаконнии, печатавшие камень, больших нас чудес сподобисте! Имут разум стражие, днесь пройде из гроба, и глаголаху: рцыте, яко нам спящим, приидоша ученицы, и украдоша Его. И кто крадет мертвеца, паче же и нага; Сам воскрес самовластно яко Бог, оставль во гробе и погребательная Своя: приидите видите иудее, како не расторже печати, смерть поправый и роду человеческому безконечную жизнь даруяй, и велию милость.

**Слава, стихира евангельская утренняя.**

**И ныне:**

**Преблагословенна** еси Богородице Дево, \* воплощшим бо ся из Тебе ад пленися, \* Адам возвася, клятва потребися, \* Ева свободися, смерть умертвися, и мы ожихом, \* тем воспевающе вопием: \* благословен Христос Бог благоволивый тако, славо Тебе.

**Славословие великое. Таже, тропарь воскресен:**

**Воскрес** из гроба, и узы растерзал еси ада, \* разрушил еси осуждение смерти Господи, \* вся от сетей врага избавивый, \* явивый же Себе апостолом Твоим, \* послал еси я на проповедь, \* и теми мир Твой подал еси вселенней, \* едине Многомилостиве.

**И отпуст**

## НА ЛИТУРГИИ

### Изобразительная, блаженна, глас 2:

**Глас** Ти приносим разбойничь, и молимся: помяни нас Спасе, во Царствии Твоем.

**Стих:** Блажени чистии сердцем, яко тии Бога узрят.

**Крест** Тебе приносим в прощение прегрешений: егоже нас ради приял еси Человеколюбче.

**Стих:** Блажени миротворцы, яко тии сынове Божии нарекутся.

**Поклоняемся** Твоему Владыко погребению, и востанию: имиже от тления избавил еси мир Человеколюбче.

**Стих:** Блажени изгнани правды ради, яко тех есть Царство Небесное.

**Смертию** Твоею Господи, пожерта бысть смерть: и Воскресением Твоим Спасе, мир спасл еси.

**Стих:** Блажени есте, егда поносят вам, и ижденут, и рекут всяк зол глагол на вы лжуще Мене ради.

**Мурносицы** сретил еси, воскрес от гроба, и учеником возвестил еси, рещи Твое востание.

**Стих:** Радуйтесь и веселитесь, яко мзда ваша многа на Небесех.

**Иже** во тьме спящии Тя свет видевши, в преисподнейших адовых Христе воскресоша.

**Слава, Троицен:** Отца прославим, Сыну поклонимся вси, и Святому Духу верно воспоем.

**И ныне, Богородичен:** Радуйся Престоле Огnezрачный. Радуйся, Невеста Невестная. Радуйся, Яже Бога человеком Дево рождающая.

### Тропарь воскресен, глас 2:

**Егда** снишел еси к смерти Животе Безсметный, \* тогда ад умертвил еси блистанием Божества: \* егда же и умершья от преисподних воскресил еси, \* вся силы небесныя зываху: \* Жизнодавче Христе Боже наш, слава Тебе.

### Кондак, глас 2:

**Воскресл** еси от гроба Всесильне Спасе, \* и ад видев чудо, ужасеся, \* и мертвии востаха: \* тварь же видящи срадуется Тебе, \* и Адам свеселится, \* и мир Спасе мой воспевае Тебя присно.

### Прокимен, глас 2:

**Прокимен:** Крепость моя и пение мое Господь, \* и бысть мне во спасение.

**Стих:** Наказуя наказа мя Господь, смерти же не предаде мя.

**Аллилуиа глас 2:** Услышит тя Господь в день печали, защитит тя Имя Бога Иаковля.

**Стих:** Господи спаси царя, и услыши ны, вонже аще день призовем Тя.